



ADRODDIAD BLYNYDDOL LLAWN I RIENI / GWARCHEIDWAID 2017-2018

Annwyl Riant / Warcheidwad,

Mae'n fraint ac anrhydedd i mi fel Cadeirydd y Corff Llywodraethol gyflwyno adroddiad blynyddol ar gyfer Ysgol Gymraeg Aberystwyth.

Pleser gennyf yw diolch i'r Pennaeth, y Dirprwy, yr holl athrawon, cynorthwy-wyr dysgu, staff ategol, y rhieni / gwarcheidwaid yn ogystal â'r disgyblion am lwyddiant cyson yr ysgol. Mae'n amlwg fod nodau'r ysgol o safbwynt Cymreictod, Parchu ein gilydd a Gwneud ein gorau glas yn parhau i ddylanwadu'n bositif ar y disgyblion ac yn cael effaith ar bawb sy'n nghlwm â'r sefydliad unigryw hwn. O ganlyniad i'r safonau dysgu ac addysgu uchel sy'n bodoli mae'r ysgol wedi ei chategoreiddio fel ysgol werdd gan Lywodraeth Cymru ac yn gweithredu fel ysgol Arloesol y Fargen Newydd.

Roedd 439 o ddisgyblion yn mynychu'r ysgol ym Mis Gorffennaf 2018 gyda Phennaeth, Dirprwy Bennaeth, 15 athrawon amser llawn amser a 6 o thrawon rhan amser. Mae tri aelod o'r staff yn gweithredu fel Penaeithiad Adran yn y Cyfnod Sylfaen, Cyfnod Allweddol 2 a'r Adran Anghenion Dysgu Ychwanegol. Mae gan yr ysgol dîm effeithiol o Gynorthwywyr sy'n cynorthwyo yn y Cyfnod Sylfaen ac yn cefnogi disgyblion sydd ag Anghenion Dysgu Ychwanegol.

Mae gan yr ysgol griw gweithgar o staff ategol sy'n cefnogi'r gwaith o ddarparu'r cyfleoedd gorau i'r disgyblion. Mae'r tîm yn cynnwys ysgrifenyddes, gofalwr, tri o lanhawyr, pump o gynorthwywyr cinio a phump o staff yn y gegin.

Eleni llwyddodd y Pennaeth i gael ei ddewis fel aelod o'r Academi Arweinyddiaeth Genedlaethol, mae'r Academi yn cynnwys deuddeg o benaeithiaid o Gymru sy'n gweithio'n agos gyda Llywodraeth Cymru er mwyn canolbwyntio ar arweinyddiaeth o fewn datblygiadau Cenhadaeth Ein Cenedl. Rydym yn falch iawn o'r llwyddiant ac yn llongyfarch y Pennaeth.

Amser a lleoliad y Cyfarfod - Mae'r gofynion ar gyfer yr angen i gynnal Cyfarfod Blynyddol y Llywodraethwyr wedi newid (gweler y manylion isod) serch hynny mi fyddwn yn darparu cyfle i drafod materion sy'n ymwneud â'r ysgol, gwaith y llywodraethwyr a'r Awdurdod Addysg fel rhan o Gyfarfod Blynyddol y Gymdeithas Rieni ac Athrawon a gynhelir yn yr ysgol Gymraeg ar nos Lun, Medi 24ain am 6.30. Mi fyddaf fel Cadeirydd yn bresennol yn ystod y cyfarfod.

Ni fu galw dros gynnal cyfarfod o'r Llywodraethwyr gyda'r Rhieni yn unol ag adran 94 o Ddeddf Safonau a Threfniadaeth Ysgolion (Cymru 2013) yn ystod y flwyddyn addysgol 2016-17.

Gweler y manylion isod sy'n tynnu sylw at ofynion cynnal cyfarfod blynyddol.

Newidiadau i gyfarfodydd Blynyddol y Rhieni / Llywodraethwyr

Mae Adran 94 y Ddeddf Safonau a Threfniadaeth Ysgolion (Cymru) 2013 (y Ddeddf) yn gwneud newidiadau pwysig i'r trefniadau deddfwriaethol blaenorol oedd yn ymwneud â Chyfarfodydd Blynyddol y Rhieni/Llywodraethwyr. Mae'n darparu trefniadau newydd lle gall rhieni ofyn am gyfarfod gyda chorff llywodraethol.

Fodd bynnag, bydd angen i'r rhieni fodloni pedwar (4) gofyniad statudol wrth alw cyfarfod sef:-

- (i) rhaid i rieni 10% o'r disgyblion cofrestredig, neu rieni 30 o'r disgyblion cofrestredig (pa un bynnag sydd isaf) arwyddo deiseb yn gofyn am gyfarfod;*
- (ii) rhaid mai diben y cyfarfod yw trafod materion sy'n ymwneud â'r ysgol;*
- (iii) y nifer fwyaf o gyfarfodydd y gall rhieni ofyn amdanynt o fewn unrhyw flwyddyn ysgol yw tri (3);*
- (iv) rhaid bod yna ddigon o ddiwrnodau ysgol ar ôl yn y flwyddyn ysgol i ganiatáu cyfarfod.*

At hynny:-

- (a) rhaid cynnal y cyfarfodydd cyn diwedd cyfnod o 25 niwrnod;*
- (b) mae'r cyfnod o 25 niwrnod yn cychwyn y diwrnod ar ôl derbyn y ddeiseb, ond nid yw'n cynnwys unrhyw ddiwrnod nad yw'n ddiwrnod ysgol;*
- (c) os oes angen cynnal cyfarfod arall o ganlyniad i ddeiseb wahanol, ni fydd y cyfnod o 25 niwrnod yn dechrau tan y diwrnod ar ôl cynnal y cyfarfod arall;*
- (ch) rhaid bod digon o ddyddiau ar ôl yn y flwyddyn ysgol i gynnal cyfarfod cyn diwedd y cyfnod o 25 niwrnod;*
- (d) bydd cyfarfodydd yn agored i holl rieni'r disgyblion cofrestredig yn yr ysgol, y Pennaeth ac unrhyw un arall a wahoddir gan y corff llywodraethol;*
- (dd) mae'n rhaid i hysbysiad y cyfarfodydd i'r rhieni gynnwys dyddiad, amser a lleoliad y cyfarfod ynghyd â'r mater neu faterion i'w trafod.*

Y mae copi o'r adroddiad hwn ar gael yn Adran y Llywodraethwyr ar safle wê'r ysgol – www.ysgolgybraeg.ceredigion.sch.uk.

Clerc y llywodraethwyr – Adran Addysg Cyngor Sir Ceredigion, Canolfan Rheidol, Rhodfa Padarn, Llanbadarn Fawr, Aberystwyth, SY23 3UE.

Cadeirydd y llywodraethwyr – Mr Dewi Jones, dewi@innovis.co.uk

Trefniadau etholiad nesaf y Corff Llywodraethol – mi fydd yr Awdurdod Addysg a'r ysgol yn hysbysu rhieni / gwarcheidwaid am drefniadau unrhyw gyfleoedd i fod yn rhan o'r Corff Llywodraethol a threfniadau etholiadau.

Hyfforddiant Mewn Swydd - gellir cael manylion llawn o'r cyrsiau a fynychwyd gan y staff rhwng Medi 2017 a Gorffennaf 2018 o'r ysgol. (gweler enghreifftiau o'r cyrsiau isod) Carwn ddiolch i'r staff am fynychu'r cyrsiau hyn.

Dyma flas o'r Hyfforddiant Mewn Swydd a fynychwyd;

Medi 20fed	Mari Davies a Caryl Davies	Hyfforddiant Proffil y Cyfnod Sylfaen	
Hydref 6ed	Staff Cynorthwyol	Pencampwyr Awtistiaeth	
Hydref 16	Staff ysgol gyfan	Hyfforddiant Epi Pen	
Hydref 20fed	Pennaeth	Cyflwyno yng nghyfarfod cenedlaethol CYDAG	
Tachwedd 17eg	Staff ysgol gyfan	Cyfarfodydd Rheoli perfformiad yn ystod y bore a chrynodeb o ddatblygiadau'r CGY yn ystod y prynhawn.	
2018			
Ionawr 9fed a 10fed, 2018	Pennaeth	Cyfarfodydd Ysgolion Arloesol yng Nghaerdydd	
Ionawr 16eg	Llŷr Evans	Codio / TGCh	
Ionawr 19eg	Caryl Davies a Cathryn Pridmore	Ysgolion Iach Ceredigion	
Chwefror 6ed	Staff CS	Diweddariad o'r deilliannau newydd ar gyfer y CS	
Tymor yr Haf			
Ebrill 23ain	Gareth James	Hyfforddiant Iechyd a Diogelwch Evolve	
Mai 24ain	Llŷr Evans Gareth James Clive Williams	Cyflwyno i Gynhadledd arfer dda ysgolion arloesol gydag Estyn yn Abertawe	
Ebrill 24ain	Clive Williams Gareth James Cathryn Pridmore	Cyflwyniad i bwyllgor yr Athro John Furlong am ddatblygu partneriaethau i hyfforddi darpar athrawon gyda Phrifysgol Aberystwyth	
Mai 3ydd	Athrawon BI 2 a 3	Cyflwyniad gan Liwsi Harries, Athrawes Ymgynghorol Mathemateg ar ddulliau pontio effeithiol mewn mathemateg rhwng BI 2 a 3	
Mehafin 22ain	Pennaeth	Cynhadledd Penaethiaid Ceredigion	
Tymor yr Haf	Staff cynorthwyol ADY	Mae rhaglen gynhwysfawr mewn lle ar gyfer diweddarau gwybodaeth ac uwch sgilio staff ar gyfer cwrdd ag anghenion pob plentyn.	

Cyfleoedd i rannu Arferion da gydag ysgolion a sefydliadau

Yn ystod y flwyddyn mae'r ysgol wedi cael cyfleoedd i rannu arferion da gydag ysgolion ar draws Cymru. Yn dilyn arolwg rhagorol 2016 bu'r Pennaeth yn cyflwyno yng Nghynhadledd Genedlaethol CYDAG yn Llandrindod. Bu staff o'r ysgol yn rhannu arferion da ym maes dysgu digidol mewn cynhadledd yng Ngheredigion. Cafwyd cyfle i rannu datblygiadau'r ysgol arloesol mewn cynhadledd Estyn yn Abertawe. Yn dilyn llwyddiant yr ysgol cafwyd nifer o ymweliadau gan staff o ysgolion Bro Hyddgen, Ysgol y Wern yng Nghaerdydd, clwstwr o ysgolion o Bowys, ysgol Aberaeron, Pontrhydfendigaid, Mynach, Syr John Rhys, Rhydypennau, Prifysgol Aberystwyth, Estyn, Pwyllgor John Furlong a Phrifysgol y Drindod Dewi Sant.

Cyfarfod Blynyddol (Hydref 2017)

Nid oedd galw am gyfarfod yn ystod Hydref 2017. Cafwyd cyfle i drafod datblygiadau'r ysgol yn ystod Cyfarfod Blynyddol y Gymdeithas Rieni ac Athrawon - rhoddwyd cyflwyniad am feysydd penodol yn ymwneud â dysgu ac addysgu a'r Cynllun Datblygu Ysgol.

Camau a gymerwyd o ganlyniad i unrhyw benderfyniadau a wnaed yn y cyfarfod - Ni chafwyd penderfyniad yng nghyfarfod Hydref 2017.

Rhydd yr atodiad restr o lywodraethwyr yr ysgol, pwy sy'n eu hapwyntio a'r dyddiad y daw tymor mewn swydd i ben.

Manylion ariannol -

- **Gweler atodiad sy'n amlinellu datganiad llawn o gyllideb yr ysgol.**

Sut mae'r ysgol yn defnyddio'r arian a dderbynnir

- Defnyddiwyd cyllideb yr ysgol er mwyn sicrhau'r profiadau addysgol gorau i'r disgyblion ac i sicrhau adnoddau addas ar eu cyfer.
- Mae'r ysgol yn defnyddio cyllid ychwanegol i dargedu llythrennedd a rhifedd.

Grant Amddifadedd Cymdeithasol - Mae'r Grant Amddifadedd Cymdeithasol yn cael ei ddefnyddio'n bwrpasol er mwyn diwallu anghenion disgyblion penodol, trefnwyd adnoddau a staff ychwanegol i gefnogi a chodi safonau yn y meysydd yma.

Rhoddion i'r ysgol

- Derbyniwyd cyfraniadau hael gan y Gymdeithas Rieni sy'n cynnwys nawdd gan fusnesau lleol yn sgil noddi cyngherddau Nadolig a Haf. Mae'r ysgol yn gwerthfawrogi'r gefnogaeth yn fawr.
- £100 – rhodd gan riant o'r Derbyn

Lwfansau neu gynhaliaeth i'r Bwrdd Llywodraethol

- Costau teithio'r Llywodraethwyr - Ni dalwyd unrhyw gostau i'r llywodraethwyr yn ystod y flwyddyn 2017-18. Dymunaf ddiolch i'm cyd lywodraethwyr am roi eu gwasanaeth yn hollol wirfoddol er budd a lles yr ysgol.

Perfformiad yr ysgol mewn asesiadau diwedd Cyfnod Sylfaen a Chyfnod Allweddol 2

Gwybodaeth gymharol am asesiadau'r disgyblion ar ddiwedd y Cyfnod Sylfaen a Chyfnod Allweddol 2 – (gweler tabl canlyniadau)

Mae'r ysgol yn bles iawn gydag asesiadau'r disgyblion yn y ddau Gyfnod Allweddol (Gweler atodiadau am asesiadau disgyblion) mae'r canlyniadau rhagorol yn adlewyrchiad o waith caled y disgyblion, y staff a chydweithrediad y rhieni / gwarcheidwaid. Mae'r ysgol yn perfformio yn dda iawn o gymharu ag ysgolion tebyg yn sirol ac yn genedlaethol.

Presenoldeb y disgyblion

Cyfnod	Presennol	Absenoldeb gyda chaniatâd	Absenoldeb heb ganiatâd
Hydref	96.55	2.54	0.91
Gwanwyn	96.17	3.31	0.52
Haf	96.46	2.1	1.45

Sylwebaeth am bresenoldeb yr ysgol

Rydym yn bles gyda chyfartaledd presenoldeb yr ysgol. Gosodwyd targedau gan y llywodraethwyr am y tair blynedd nesaf er mwyn parhau i wella presenoldeb. Bu'r ysgol yn rhoi ffocws ar brydlondeb yn ystod y flwyddyn, hoffwn ddiolch i'r rhieni a'r gwarchodwyr am ymateb yn bositif i'r ymgych.

Gwella presenoldeb a lleihau absenoldebau anawdurdodedig

Mae'r ysgol yn dilyn camau pendant i leihau absenoldebau heb ganiatâd, Mae plant sy'n cyrraedd yn hwyr yn medru effeithio ar absenoldebau anawdurdodedig. Mae'r ysgol yn danfon llythyr i rieni i bwysleisio prydlondeb ac i dynnu sylw at y sefyllfa lle mae rhai yn cymryd gwyliau yn ystod tymor yr ysgol. Mae'r ysgol yn cysylltu gyda rhieni / gwarcheidwaid lle mae lefel presenoldeb yn isel neu'n anghyson.

Targedau ar gyfer presenoldeb

Targedau presenoldeb am y flwyddyn addysgol 2018-2019 - 96.5%

Targedau presenoldeb am y flwyddyn addysgol 2019-2020 - 96.6%

Targedau presenoldeb am y flwyddyn addysgol 2020-2021 - 96.7%

Plant sy'n gadael yr ysgol ar ddiwedd Blwyddyn 6 – mae disgyblion ar ddiwedd Blwyddyn 6 yn trosglwyddo fel arfer i ysgolion uwchradd y dref sef Penweddig a Phenglais. Eleni aeth 52 i Benweddig a 6 i Benglais. Mae gan yr ysgol bartneriaeth bositif gyda'r ysgolion uwchradd ac yn gweithredu cynlluniau pontio effeithiol. Dymunwn yn dda i'r criw fydd yn trosglwyddo eleni.

Meithrin cysylltiadau rhwng yr Ysgol a'r Gymuned

Y mae'r ysgol yn un o brif sefydliadau'r dref ac yn rhan annatod o'r gymuned leol. Mae'r ysgol yn gwneud defnydd arbennig o adnoddau lleol gan gynnwys y Llyfrgell Genedlaethol, Y Brifysgol, Canolfan Hamdden, Canolfan y Celfyddydau a'r ysgol uwchradd leol. Bu'r ysgol ar nifer o ymweliadau addysgol gan gynnwys Castell Henllys, Ffermydd lleol, Glan-llyn a.y.b. Bu'r ysgol yn perfformio i fudiadau lleol ac mae cefnogaeth dda iawn i'r ddau gyngerdd mawreddog blynyddol yng Nghanolfan y Celfyddydau.

Cynhaliwyd gweithgareddau er mwyn hybu dealltwriaeth o godi arian at achosion da yn ystod y flwyddyn. Casglwyd symiau hael ar gyfer Plant Mewn Angen.

Cymdeithas Rieni ac Athrawon / Cyfeillion yr Ysgol

Hoffwn ddiolch i'r Gymdeithas Rieni ac Athrawon a holl gyfeillion yr ysgol am eu cefnogaeth yn ystod y flwyddyn. Mae'r Gymdeithas Rieni ac athrawon yn weithgar a brwdfrydig iawn ac yn llwyddo i gynnal

amrywiol weithgareddau i godi arian tuag at brynu adnoddau ac i drefnu achlysuron cymdeithasol gyda naws deuluol Gymreig iddynt.

Cynhaliwyd gweithgareddau drwy gydol y flwyddyn gan gynnwys Ffair lyfrau, Cyngherddau, Disgo Dwynwen, Prynawn Coffi, Noson Gymdeithasol / Barbeciw a Thaith Gerdded Noddedig. Mae datblygu'r ardd natur fel ardal chwarae ac ymlacio ychwanegol i'r disgyblion wedi bod yn ffocws i gyllid y Gymdeithas Rhieni ac Athrawon yn ystod y flwyddyn. Bydd adroddiad llawn o'r gweithgareddau a'r arian a godwyd yng nghyfarfod blynyddol y Gymdeithas Rhieni yn nhyddor yr Hydref.

Cyfarfodydd Rhieni / gwarcheidwaid - mae yna bartneriaeth ragorol yn bodoli gyda'r rhieni. Yn ystod y flwyddyn

Trefnir;

- Cyfarfod blynyddol y Gymdeithas Rhieni ac Athrawon.
- Nosweithiau agored bob tymor a gwahoddiad i'r rhieni / gwarcheidwaid i ddod i'r ysgol ar ôl derbyn adroddiadau eu plant ym mis Gorffennaf.
- Gwahoddiad i rieni /gwarcheidwaid ddod i brynawn agored yn yr ysgol.
- Gwahoddiad i fabolgampau'r ysgol.
- Cynhelir dau gyngerdd mawreddog y flwyddyn (gyda thua 800 yn mynychu bob tro).
- Cyfarfod ar gyfer rhieni / gwarcheidwaid plant y meithrin sydd am gychwyn yn yr ysgol.
- Cyfarfod rhwng rhieni / gwarcheidwaid plant sy'n derbyn cefnogaeth a'r athrawon arbenigol.
- Mae'r pennaeth yn nodi ar bob llythyr "os oes gennych unrhyw bryderon am addysg eich plentyn yna cysylltwch â mi ar unwaith"

Defnydd o'r adeilad / campws - Cyfarfod rhieni ac athrawon yr Ysgol Gymraeg, rhai timau pêl-droed, yr Angor (papur bro Aberystwyth), Adran Tref Aberystwyth, Cyfarfodydd Cenedlaethol yr Urdd, Eisteddfodau'r Urdd, Gang y Graig a'r Clwb Bridge.

Cysylltiadau gyda'r heddlu – mae swyddogion o'r heddlu yn gweithio'n agos gyda'r ysgol ac yn cyfrannu yn bositif at weithgareddau addysg bersonol a chymdeithasol. Mae'r heddlu yn trafod gyda'r Cyngor Ysgol ac yn cynorthwyo gyda'r drafndiaeth ger mynedfa'r ysgol.

Cynnydd ar Gynllun Gweithredu'r Ysgol (ar ôl arolygiad)

Mae'r ysgol yn gweithredu'r Cynllun Gweithredu yn dilyn adroddiad Estyn 2016. Dyma grynodeb o'r datblygiadau.

Disgrifiad/gweithgaredd/cynnydd	Cynnydd
A1 - Sicrhau bod y ddarpariaeth ar gyfer datblygu medrau technoleg gwybodaeth a thechnoleg (TGCh) disgyblion yn adeiladu'n fwy systematig ar y rheini y maent eisoes wedi eu caffael	Mae'r ysgol yn dilyn cynllun gweithredu yn dilyn Arolwg 2016. Mae'r ffocws ar ddatblygu agweddau o ddysgu Digidol. Mae Llŷr Evans yn gyswllt rhwng yr ysgol a'r Awdurdod Addysg (yn benodol Kay Morris, Athrawes Ymgynghorol TGCh) Mae cyfarfod pob hanner tymor er mwyn tracio cynnydd yr ysgol o safbwynt addasu y Fframwaith Ddigidol Genedlaethol. Mae cyfarfodydd staff yn canolbwyntio ar bersonoli'r Fframwaith i ofynion a themâu'r Ysgol Gymraeg. Mae amserlen gadarn yn ei lle ar gyfer ffocysu ar y gwahanol agweddau sydd o fewn y fframwaith. Yn dilyn gweithgareddau'r ysgol fel un arloesol mae'r ysgol wedi bod yn cyflwyno datblygiadau cyffrous mewn cynhadledd genedlaethol a drefnwyd gan Estyn yn Abertawe yn ystod Mai 2018. Cafwyd canmoliaeth mawr i'r cyflwyniad a'r gwaith oedd ar y gweill yn yr ysgol.

Hunanarfarnu a Chynllun Datblygu Ysgol

Prif flaenoriaethau'r ysgol

1. Ymestyn y disgyblion Mwyaf Abl a Thalentog ar draws yr ysgol gan ganolbwyntio yn benodol ar weithgareddau mathemateg a gwyddoniaeth yng Nghyfnod Allweddol 2.
2. Codi safonau llythrennedd grwpiau penodol o ddisgyblion ar draws yr ysgol.
3. Codi safonau Rhifedd grwpiau penodol o ddisgyblion ar draws yr ysgol.
4. (Estyn 2016) A1 Sicrhau bod y ddarpariaeth ar gyfer datblygu medrau technoleg gwybodaeth a thechnoleg (TGCh) disgyblion yn adeiladu'n fwy systematig ar y rheini y maent eisoes wedi eu caffael
5. Datblygu defnydd cymdeithasol y disgyblion o'r Gymraeg yn yr ysgol gan ddilyn strategaethau Siartr Iaith Ceredigion.
6. Gwreiddio arweinyddiaeth ddostranedig er mwyn datblygu cwricwlwm sy'n ennyn diddordeb a chwilfrydedd.

Mae'r ysgol wedi gwneud cynnydd da i ddatblygu agweddau'r Cynllun Datblygu Ysgol yn ystod y flwyddyn flaenorol - gellir cael copi llawn o'r CDY gan y pennaeth.

Gwelliannau a osodwyd gan y Corff Llywodraethol ynglŷn â pherfformiad y disgyblion

Targedau ar gyfer y tair blynedd nesaf

Gweler y targedau ar gyfer nifer y disgyblion fydd yn cyrraedd deilliant 5 neu'n uwch yn y Cyfnod Sylfaen a lefel 4 neu'n uwch yng Nghyfnod Allweddol 2 am y dair mlynedd nesaf. Mae'r ysgol yn gosod y targedau yma yn sgil y wybodaeth bresennol sydd gennym am y disgyblion yn ôl asesiadau athrawon blyneddol. Yn ogystal â hyn rydym yn gosod lefel o her ar gyfer y dyfodol er mwyn codi safonau yn barhaus.

	Haf 2018	Haf 2019	Haf 2020
Cyfnod Sylfaen	98% (cyfartaledd DCS)	98%	98.5%
Cyfnod Allweddol 2	97% (cyfartaledd DPC)	97.5%	98%

Sylwebaeth

- Mae'r ysgol wedi gwneud cynnydd da o safbwynt asesiadau'r disgyblion yn y ddau Gyfnod Allweddol.
- Mae'r canlyniadau yn adlewyrchu yn bositif ar y targedau heriol a osodwyd pob blwyddyn.
- Yn dilyn asesiadau cyson a nifer o brofion nodir pa lefel / deilliant y mae pob plentyn yn cyrraedd erbyn diwedd y flwyddyn. Ceir cysylltiad agos rhwng athrawon er mwyn cymedroli lefelau ac adnabod y ffordd ymlaen i'r plentyn unigol.
- Mae plant yn derbyn targedau cyson mewn Iaith, Mathemateg, Gwyddoniaeth a Saesneg yng Nghyfnod Allweddol 2.
- Fel ysgol rydym yn anelu i sicrhau bod 98% o blant yn y Cyfnod Sylfaen a 97% o blant Cyfnod Allweddol 2 yn cyrraedd y lefel / deilliant disgwylidiedig (deilliant 5 neu'n uwch ar gyfer y Cyfnod Sylfaen a lefel 4 neu'n uwch ar gyfer CA 2).
- Rhoddir adroddiad manwl i bob rhiant ar ddiwedd y flwyddyn a bydd nosweithiau agored cyson a chyfle i drafod yr adroddiad diwedd y flwyddyn.

Diarddel Plant

Gwaharddwyd un disgybl (dros dro) yn ystod y flwyddyn addysgol 2017-18

Adolygu Polisiâu a strategaethau'r ysgol - mae'r ysgol yn adolygu polisiâu yn gyson er mwyn sicrhau'r ddarpariaeth orau ar gyfer y disgyblion. Yn ystod 2017-18 adolygwyd holl bolisiau'r ysgol ac yn benodol y rhai sydd yn ymwneud ag iechyd a diogelwch, diogelu plant, bwlio, a rhai agweddau cwricwlaidd. Mae copïau o'r polisiâu ar gael o'r ysgol neu ar y wefan. Mae'r rhestr o'r polisiâu sydd wedi eu hadolygu yng nghofnodion y llywodraethwyr ger y brif fynedfa.

Gweithredu ar ôl adolygu polisiâu - Mae'r datblygiadau yn cael eu monitro'n gyson yn y cyfarfodydd tymhorol. Mae staff o'r ysgol wedi derbyn hyfforddiant pellach ar ddiogelu plant a gweithredu gweithdrefnau ysgol awtistiaeth gyfeillgar. Mae'r ysgol wedi gwella diogelwch drwy wella'r ffensys sydd rhwng yr ysgol a'r ardd natur.

Chwaraeon a Gweithgareddau Allgyrsiol

Mae'r ysgol yn darparu amrywiaeth o weithgareddau chwaraeon ym mhob agwedd o Addysg Gorfforol. Mae'r disgyblion yn meithrin sgiliau a phrofiadau o'r Meithrin i fyny at Flwyddyn 6. Mae'r ysgol yn profi llwyddiant ar lefel genedlaethol ac yn 2017-18, llwyddwyd i gyrraedd safonau uchel yn rowndiau cenedlaethol mewn nofio, trawsgwlad, rygbi, pêl-droed, gymnasteg, pêl-rwyd, hoci, athletau a chriced.

Mae yna raglen allgyrsiol eang sy'n anelu at foddio diddordebau holl ddisgyblion yr ysgol. Cyhelir Clwb yr Urdd yn wythnosol lle mae staff yr ysgol yn gwirfoddoli i gynnig gweithgareddau amrywiol i'r disgyblion. Mae'r gweithgareddau yng Nghyfnod Allweddol 2 yn cynnwys chwaraeon, clwb rhedeg wythnosol chwys trabŵd, clwb celf, clwb gymnasteg a chlybiau gweithgareddau amrywiol ar gyfer y Cyfnod Sylfaen. Mae'r ysgol yn cefnogi gweithgareddau hoci gyda chyngrhair y Mini Minor pob nos Wener.

Mae cysylltiad cryf yn bodoli rhwng yr ysgol â mudiad yr Urdd ac mae disgyblion yn cael profiadau cyfoethog wrth ddilyn rhaglen o weithgareddau'r flwyddyn. Pob blwyddyn mae staff yr ysgol yn paratoi disgyblion ar gyfer yr eisteddfodau cylch, rhanbarthol a chenedlaethol ac yn profi llwyddiant mewn amrywiol feysydd ar lefel genedlaethol. Mae'r ddau gyngerdd a gynhelir yn y Neuadd Fawr yn boblogaidd iawn gan y rhieni a'r gymuned.

Bu criw mawr o ddisgyblion yr ysgol yn cystadlu yn Eisteddfod Genedlaethol yr Urdd Brycheiniog a Maesyfed. Llwyddwyd i gael gwobrau cyntaf mewn ysgrifennu creadigol a cherddoriaeth greadigol, cafwyd yr ail wobwr am y gerddorfa a'r grŵp dawnsio amlgyfrwng a'r drydedd wobwr yn yr unawd pres a'r unawd cerdd dant. Hoffwn ddiolch yn fawr iawn i'r holl ddisgyblion, staff a rhieni am ei gwaith caled yn ystod wythnos y Sulgwyn. Hoffwn ddiolch i'r holl hyfforddwyr am eu gwaith ac i'r rhieni am bob cydweithrediad a chefnogaeth.

Bwyta ac yfed yn iach – mae'r ysgol yn hybu iechyd y disgyblion ac yn awyddus eu bod yn magu patrymau iachus o fwyta ac yfed. Mae cinio ysgol iachus yn cael ei ddarparu yn ddyddiol ac anogir disgyblion i fwyta pecynnau bwyd iach i ginio. Mae'r siop ffrwythau ar agor yn ddyddiol ac mae digon o ddŵr ar gael i'r disgyblion, anogir pob disgybl i ddod â photel blastig bwrpasol ar gyfer ei llenwi yn ystod y dydd. Mae cwmni creu ysgythaeth Blwyddyn 3 wedi datblygu llaeth ar gyfer y disgyblion yn achlysurol yn ystod y flwyddyn.

Newidiadau i Lawlyfr yr ysgol – Mae'r llawlyfr yn cael ei adolygu a'i ddiweddarau yn dymhorol. Mae copi o'r llawlyfr ar gael ar wefan yr ysgol neu drwy law'r pennaeth. Bu newidiadau i gynnwys y llawlyfr yn ystod y flwyddyn gyfredol er mwyn gwella'r diwyg.

[Dyddiadau'r tymor ar gyfer y flwyddyn](#)
(gweler atodiad)

Diwrnodau cau HMS

Medi 3ydd, 2018, Tachwedd 16eg, 2018, Ionawr 7fed, 2019, Ebrill 29ain, 2019

Amserau Sesiynau

	CA 2	Cyfnod Sylfaen	Meithrin
Cychwyn yr ysgol	9.00	9.00	9.00
Egwyl bore	10.30 – 10.45	10.30 – 10.45	10.30 – 10.45
Cinio	12.00 – 1.00	11.45 – 1.00	11.50 – 1.15
Cychwyn y prynhawn	1.00	1.00	1.15
Egwyl y prynhawn	2.20 – 2.30	2.20 – 2.30	2.20 – 2.30
Amser gorffen	3.30	3.30 (Bl 1 a 2) 3.20(Derbyn)	3.20

Cwricwlwm a threfniadaeth addysgu

Mae'r ysgol yn un o ysgolion arloesol Cymru ac yn gweithredu fel sefydliad sy'n rhannu arfer dda ac yn arloesi ym myd addysgu a dysgu. Mae ansawdd ac amrywiaeth y profiadau dysgu a ddarperir i'r disgyblion ar draws yr ysgol yn bwysig iawn i ni. Cynigir cwricwlwm eang a chytbwys sy'n cwrdd â'r holl ofynion statudol. Mae'r athrawon yn parhau i adolygu'r cwricwlwm yn sgil datblygiadau newydd. Mae pwyslais mawr yn cael ei osod ar ddatblygu sgiliau cyfathrebu, sgiliau rhif, sgiliau TGCh a sgiliau meddwl. Mae'r ysgol wedi cydweithio yn agos iawn gyda Phrifysgol Aberystwyth ar gyfer datblygu rhaglen o brofiadau cyfoethog i ddarpar athrawon y dyfodol.

Anghenion Dysgu Ychwanegol Mae'r ysgol yn gwneud pob ymdrech i sicrhau fod pob plentyn yn teimlo'n rhan annatod o fywyd a gwaith yr ysgol ac yn cyflawni eu potensial fel unigolion. Mae'r ysgol yn adolygu'r polisi Anghenion Dysgu Ychwanegol yn rheolaidd er mwyn sicrhau cefnogaeth addas i ddisgyblion.

Disgyblion sydd ag anableddau Mae campws yr ysgol wedi ei addasu'n gyson er mwyn rhoi mynediad rhwydd i ddisgyblion sydd ag anableddau, gosodwyd rampiau i hybu mynediad i ddosbarthiadau a llwyddwyd drwy gynllunio gofalus i blethu plant ag anableddau yn llawn i gwricwlwm yr ysgol.

Categori iaith yr ysgol – Ysgol Gymraeg benodedig

Defnydd o'r Gymraeg yn yr ysgol

- Defnyddir y Gymraeg yn y Cyfnod Sylfaen a Chyfnod Allweddol 2 fel y brif iaith ym mhob rhan o waith cwricwlaidd ac allgyrsiol yr ysgol. Cyflwynir Saesneg i ddisgyblion ym Mlwyddyn 3.
- Y Gymraeg yw iaith gyfathrebu naturiol yr ysgol.
- Nid oes unrhyw gyfyngiad ar ddefnydd y Gymraeg yn yr ysgol, hyrwyddir y Gymraeg ym mhob agwedd o fywyd a gwaith Ysgol Gymraeg Aberystwyth.
- Mae'r ysgol yn sicrhau drwy gynllunio gofalus fod yna barhad a datblygiad cyson yn y profiadau i ddefnyddio'r Gymraeg yn holl weithgareddau cwricwlaidd ac allgyrsiol yr ysgol.
- Mae disgyblion sy'n hwyr ddyfodiaid i'r ysgol yn medru cymryd mantais o ddarpariaeth y Ganolfan Iaith a drefnir gan yr Awdurdod Addysg yn ysgol uwchradd Penweddig.
- Mae disgyblion yn trosglwyddo i ysgolion uwchradd y dref lle mae cyfleoedd iddynt barhau i ddatblygu eu defnydd o'r Gymraeg. Mae cyfleoedd pontio estynedig ar gael i ddisgyblion sydd angen magu rhagor o hyder yn y Gymraeg ar gael yn ystod tymor yr Haf.

Trefniadau a chyfleusterau toiled -

Mae gan yr ysgol nifer addas o doiledau ar gyfer y disgyblion sydd wedi eu cofrestru yn yr ysgol. Mae'r cyfleusterau yn cael eu glanhau yn ddyddiol gan wasanaeth glanhau'r Awdurdod Addysg. Mae 'Pwyllgor Taclo'r Toiledau' yn effeithiol sef criw o ddisgyblion sy'n gweithio ar ran y Cyngor Ysgol i wella'r toiledau gyda'r Uwch Dim Rheoli. Llwyddwyd i ddatblygu toiledau'r Meithrin yn ystod y flwyddyn.

Cynnal a chadw'r adeiladau

Mae'r ysgol wedi datblygu ardal yr ardd natur yn ystod y flwyddyn er mwyn hwyluso mynediad a defnydd y disgyblion o'r adnodd gwerthfawr yma. Mae'r ardd natur ar gael i'r disgyblion yn ystod amser chwarae ac mae yna amserlen ofalaeth fanwl yn cael ei gweithredu. Mae'r Gymdeithas Rhieni ac Athrawon wedi cyfrannu'n hael at y datblygiad hwn yn ystod tymor y gwanwyn a'r haf.

Diogelwch

Y mae yswiriant yr ysgol yn caniatáu disgybl i fod yn yr ysgol o 8.45 ymlaen (Clwb Brechwast 8.15-8.45). Yn y prynhawn bydd y plant Meithrin yn gadael am 3.20 a'r disgyblion eraill am 3.30. Cyn hynny mae disgwyl i rieni neu warchodwyr nodi eu presenoldeb yn y swyddfa ger y brif fynedfa.

Rhaid parcio'n ofalus o flaen yr ysgol a pheidio parcio mewn mannau anabl/tacsi nac ar y gwair. Ni ddylid ychwaith barcio ar ffordd ysgol Plascrug oherwydd y peryg o dagfeydd traffig.

Mae diogelwch yn bwysig iawn i'r llywodraethwyr, yr Uwch Dim Rheoli, y Cyngor Ysgol a'r staff. Rhaid bod yn ofalus a pharchu eraill.

Datblygiadau diogelwch yr adeilad – mae adnewyddu'r ffens sy'n rhan o ardal yr ardd wedi gwella diogelwch ac yn atal mynediad i ddieithriaid.

Torri i mewn

Ni chafwyd yr un achos o dorri i mewn i'r ysgol yn ystod y flwyddyn academiaidd yma.

Gobeithio eich bod wedi cael budd o ddarllen am ddatblygiadau'r ysgol brysur hon. Cofiwch gysylltu gyda'r Pennaeth os ydych am wybodaeth bellach am ddatblygiad yr ysgol.

Diolch i chi eto fel rhieni am eich ymrwymiad i'r ysgol, mae eich cefnogaeth yn rhan bwysig o ddatblygiad addysgol a chymdeithasol eich plant ac i ddiwylliant unigryw'r Ysgol Gymraeg.

Mr Dewi Jones, Cadeirydd y Llywodraethwyr